

სამი მატჩი იუგოსლავიაში

გვესაუბრება თბილისის “დინამოს” ფეხბურთელთა გუნდის უფროსი კ. ასათიანი

– მოსტარის საერთაშორისო ტურნირს, რომელშიც ახლახან მონაწილეობა მიიღო თბილისის “დინამომ”, კარგა ხნის ტრადიცია აქვს – 17 წელია იმართება და მის წარმომადგენლობითობაზე მეტყველებს თუნდაც ის, რომ 1976 წელს ამ გარდამავალი თასის ფინალში იბრძოდნენ სსრ კავშირის ნაკრები და ცნობილი იუგოსლავიური გუნდი – “ცრვენა ზეზდა”. მატჩი საბჭოთა ფეხბურთელების გამარჯვებით დამთავრდა. ცხადია, ამით ტურნირის პერსტიჟი საკმაოდ ამაღლდა და შემდგომ მასში უცხოეთის არაერთი გუნდი გამოსულა.

ამჯერად კი შეჯიბრებაში 4 გუნდი ჩაება: ადგილობრივი “ველეუი”, ბელგრადის “პარტიზანი”, ტიტოგრადის “ბუდუჩნოსტი” და თბილისის “დინამო”. პირველ მატჩში, რომელიც “ველეუის” მრავალათასიან სტადიონზე გაიმართა, ერთმანეთს შეხვდნენ “ველეუი” და “ბუდუჩნოსტი”. როცა თამაშისთვის განკუთვნილი დრო ამოიწურა, ანგარიში იყო 2:2. ამის გამო დაინიშნა 11-მეტრიანი დარტყმების სერია, რის წყალობითაც გამარჯვება (6:5) მასპინძლებს ხვდათ და ამით “ველეუმა” ფინალისკენ გაიკაფა გზა. მეორე ფინალისტი “დინამოსა” და “პარტიზანის” შეხვედრას უნდა გამოეყვლინა. თბილისელმა ფეხბურთელებმა, რომელთა რიგებში იყვნენ გაბელია, კოსტავა, ხიზანიშვილი, ხინჩაგაშვილი, თავაძე, დარასელია. ჯოხაძე (სვანაძე მე-60 წ.), ჟვანია (მუჭირი 46-ე წ.), გუცაევი, ყიფიანი, შენგელია, შესანიშნავად ითამაშეს და გაიმარჯვეს ანგარიშით – 1:0. ეს გადამწყვეტი გოლი გაიტანა შენგელიამ, რომელიც ყიფიანმა შესანიშნავი გადაცემით გაიყვანა კარის წინ.

8 თებერვალს ტურნირის მონაწილეთა დელეგაციები ეწვივნენ “პარტიზანული დიდების მემორიალს” და გვირგვინებით შეამკეს დაღუპულ გმირთა საფლავები. ამავე დღეს შედგა მატჩი მესამე ადგილის გამოსავლენად “პარტიზანსა” და “ბუდუჩნოსტს” შორის. 90 წუთი ისე ამოიწურა, ანგარიში არ გახსნილა, დამატებით პენალტების სერიაში კი “პარტიზანმა” იმარჯვა – 3:2.

და აი, ტურნირის მთვარი მატჩი თბილისის “დინამოსა” და “ველეუს” შორის. ამ შეხვედრისადმი ინტერესს ისიც ზრდიდა, რომ მასპინძელთა ცენტრალური თავდამსხმელის ხალიხოჯიჩის (ეს სახელი მსოფლიოს საფეხბურთო წრეებში საკმაოდ აცნობილი იგი ამას წინათ გფრ-ში გამართულ მატჩში მსოფლიოს ვარსკვლავთა ნაკრების ღირსებას იცავდა) შესასყიდად მოსტარს სპეციალურად ეწვივნენ დასავლეთ გერმანიის ცნობილი კლუბის “შტუტგარტის” მენეჯერები და ხალიხოჯიჩი ალბათ ამიტომაც დიდი აღმავლობით თამაშობდა. ეს პირველ რიგში იმაში გამოიხატა, რომ ორივე ბურთი ჩვენს კარში (თამაში დამთავრდა ანგარიშით 2:1 მასპინძელთა სასარგებლოდ) სწორედ მან გაიტანა. ანგარიში 11-მეტრიანი დარტყმით გაიხსნა, რომელიც ხალიხოჯიჩმა ჩვენს კარში გაიტანა. უნდა ითქვას, რომ მსაჯის ეს გადამწყვეტილება საკმაოდ საეჭვოდ გვეჩვენა. გოლს სულ რამდენიმე წუთის შემდეგ ყიფიანის შესანიშნავი რეიდი მოჰყვა. მის მიერ მეტოქის საჯარიმოზე ჩაკიდებულ ბურთს ნახტომში მიწვდა თავაძე და თავით “ველეუის” ბადეში მოათავსა. ამის შემდეგ ყიფიანმა ერთხელ კიდევ აიღო მასპინძელთა კარი, მაგრამ მსაჯის სასტვენის გოლს დუმილით შეხვდა. ამ საინტერესო და დაძაბულ ორთაბრძოლას წერტილი ისევ ხალიხოჯიჩმა დაუსვა. ეს მას შემდეგ მოხდა, როდესაც ?–წუთზე ჩვენს კარში საჯარიმო დაინიშნა. მისი

შესრულება ცენტრორვარდს დაევალა, რომლის დარტყმა დინამოელთა ერთ-ერთ მცველს მოხვდა, ბურთმა იცვალა მიმართულება და კარში აღმოჩნდა. 2:1 – გამარჯვა “ველეუმა”. “დინამო” მეორე ადგილზე გავიდა. ამ მატჩში თბილისელთა ღირსებას იცავდნენ: გაბელია, კოსტავა, ხიზანიშვილი, ხონჩაგაშვილი, მუჯირი, დარასელია, თავაძე, სვანაძე (ჯოხაძე), გუცაევი, ყიფიანი, შენგელია.

“დინამო” ე. მოსტარიდან სპლიტში დაბრუნდა, სადაც 10 თებერვალს ამხანაგური შეხვედრა გამართა თბილისელთა ძმადნათიქ ქალაქ ლიუბლიანის “ოლიმპიასთან”. ეს გუნდი, რომელიც ამ რამდენიმე წლის წინათ თბილისში მორიდებული მაჩვენებლებით წარსდგა, ახლა საკმაოდ მომძლავრებულა და თავისი ეროვნული ჩემპიონატის ლიდერთა შორის არის. მასთან შეხვედრაში გამარჯვება “დინამოს” დარჩა – 1:0. ბურთი გაიტანა შენგელიამ. დინამოელთა შორის იყვნენ: გაბელია, კოსტავა, ხიზანიშვილი, ხონჩაგაშვილი, მუჯირი, დარასელია, თავაძე, ჯოხაძე (ჩქარეული) გუცაევი, ყიფიანი, შენგელია.

“ლელო”, 14 თებერვალი, 1981 წ.